



Rabu, 14 Oktober 2020

Ogen: Kuan-Kuanen 19:2



Mejingat Radu ras Pemeteh



Biasa ngena ateta kalak mejingkat. Bandingkan ras kalak serut maka kalak mejingkat jadi kal ateta. Adi kalak serut kadena pe la runut, ayona pe rusur serbut, emaka ngenen-ngenen pe ukurta sangkut. Kalak mejingkat, eme kalak si la perkisat. Erkai pe suruh la pernah kedat. Emaka kalak mejingkat i ja pe biasa tampil geluhna. La iakap kalak rugi mereken dahin man bana sabap minter idahikenna la tertima-tima. Saja i bas ogenta sendah mpersingeti banta kerina maka amin gia biak mejingkat mehuli, tapi adi labo radu ras pemetehter la kepe mehuli.

Lit sada biak kepe i bas kegeluhen enda maka lit kalak erkai pe suruh minter dahikenna lenga pe jelas man bana, piah kuskas idah tapi la erbekas. Lit sada nari biak eme kalak si mesegu iperdiateken kalak ia. Erdandanken sie maka iperkuskasna man bana. Labo ietehna kai si man dahin tapi erdalan ku jah ku je ia lalap gelah kerina mata natap ku ia. Kerina enda biak si la mehuli.

Si dimaksudken penulis Kitab Kuan-kuanen maka biak mejingkat i bas geluhta tetap si kuhi alu nambahi pemetehter i bas ndahiken dahinta. Kai pe pendahinta mehuli adi teptep paksa banci ka si tambahi pemetehter (keterampilan/skill) guna banci reh ulina bekasta erdahin. Adi nggit kita nambahi pemetehter maka kai pe pendahinta la pernah ketadingen jaman sabap nggit kita lalap nambahi pemetehter. Adi silakoken enda maka la aru ateta i tengah erbage persaingan ras tantangan si lit sabap tetap kita ngasup encihdahken ulih pendahinta si erkualitas. Alu bage selaku Moria tetap teridah kreativitasta si jadi usihen kalak sideban, i bas kerina dampar, jadi pasu-pasu man kalak sideban tentuna mpermultiaken Dibata si enggo mereken pemetehter man banta.

 Tambahi teptep paksa pemetehter i bas ndahiken dahinta.